

四庫全書

集部

欽定四庫全書

集部

成都文類卷十四

詳校官左中允臣允璫五珠

助教臣常衡覆勘

總校官知縣臣繆琪

校對官編修臣邱庭灝

謄錄監生臣毛金湖

欽定四庫全書

成都文類卷十四

宋扈仲榮等編

詩

遭田父泥飲美嚴中丞

唐杜甫

步屨隨春風村村自花柳田翁逼社日邀我嘗春酒酒

酣誇新尹畜眼未見有迴頭指大男渠是弓弩手名在飛騎
籍長年歲時久前日放營農辛苦救衰朽差科死則已誓不

舉家走今年大作社拾遺能住否叫婦開大瓶盆中為吾取感
此氣揚揚須知風化首語多雖雜亂說尹終在口朝來偶然
出自卯將及酉久客惜人情如何拒鄰叟高聲索果粟欲起
時被肘指麾過無禮未覺村野醜月出遮我留仍嗔問升斗

宿府

前人

清秋幕府井梧寒獨宿江城蠟炬殘永夜角聲悲自語
中天月色好誰看風塵荏苒音書絕關塞蕭條行路難
已忍伶俜十年事強移棲息一枝安

進艇

前人

南京久客耕南畝北望傷神卧北窓晝引老妻乘小艇
晴看稚子浴清江俱飛蛱蝶元相逐並蒂芙蓉本自雙
茗飲蘆漿携所有瓷罌無謝玉為缸

賓至

前人

患氣經時久臨江卜宅新喧卑方避俗疎快頗宜人有
客過茅宇呼兒正葛巾自劙稀菜甲小摘為情親

出郭

前人

霜落曉淒淒高天遙望低遠煙鹽井上斜景雪峰西故
國猶兵馬他鄉亦鼓鼙江城今夜客還與舊烏啼

野老

前人

野老籬前江岸回柴門不正逐江開漁人網集澄潭下
賈客船隨互照來長路關心悲劍閣片雲何意傍琴臺
王師未報收東郡城闕秋生畫角哀南京同兩府
得云城闕也

為農

前人

錦里煙塵外江村八九家圓荷浮小葉細麥落輕花卜

完從茲老為農去國賒遠慚勾漏令不得問丹砂

過故斛斯校書莊二首

前人

此老已云歿鄰人嗟亦休竟無宣室召徒有茂陵求妻子寄他食林園非昔遊空餘總帷在浙浙野風秋
燕入非傍舍鷗歸祇故池斷橋無復版卧柳自生枝遂有山陽作多慚鮑牀知素交零落盡白首淚雙垂

絕句六首

前人

日出籬東水雲生舍北泥竹高鳴翡翠沙僻舞鷗雞

藹藹花葉亂飛飛蜂蝶多幽棲身懶動客至欲如何
鑿井交樓葉開渠斷竹根扁舟輕裹纜小逕曲通村
急雨梢溪足斜暉轉樹腰隔巢黃鳥並翻藻白魚跳
舍下筍穿壁庭中藤刺簷地晴縱冉冉江白草纖纖
江動月移石溪虛雲傍花鳥棲知故道帆過宿誰家

狂夫

前人

萬里橋西一草堂百花潭水即滄浪風含翠篠娟娟靜
雨裏紅渠冉冉香厚祿故人書絕斷恒飢稚子色淒涼

欲填溝壑唯踈放自笑狂夫老更狂

絕句四首

前人

堂西長筍別開門塹北行樹却背村梅熟許同朱老喫

松高擬對阮生論

朱阮劍外相知

欲作魚梁雲覆湍因驚四月雨聲寒清溪先有蛟龍窟
竹石如山不敢安

兩個黃鸝鳴翠柳一行白鶯上青天總含西嶺千秋雪

門泊東吳萬里船

西山白雪四時不消

藥條藥甲潤青青色過棕亭入草亭苗滿空山慙取譽
根居隙地怯成形

所思

前人

苦憶荊州醉司馬崔吏謫官樽俎定常開九江日落醒
何處一柱觀頭眠幾回可憐懷抱向人盡欲問平安無
使來故澆錦水將雙淚好過瞿塘灑瀨堆

屏跡

前人

用拙存吾道幽居近物情桑麻深雨露燕雀半生成村

皷時時急漁舟箇箇輕杖藜從白首心跡喜雙清
晚起家何事無營地轉幽竹光圍野色舍影漾江流失
學從兒懶長貧任婦愁百年渾得醉一月不梳頭

有客

前人

幽棲地僻經過少老病人扶再拜難豈有文章驚海內
漫勞車馬駐江干竟日淹留佳客坐百年麤糲腐儒食
不嫌野外無供給乘興還來看藥欄

遣興

前人

干戈猶未定弟妹各何之拭淚霑襟血梳頭滿面糾地
卑荒野大天遠暮江遲衰疾那能久應無見汝時

三絕句

前人

楸樹馨香倚釣磯斬新花藥未應飛不如醉裏風吹盡
可忍醒時雨打稀

門外鷗鷺久不來沙頭忽見眼相猜自今已後知人意
一日須來一百迴

無數春筍滿林生柴門密掩斷人行會須上番看成竹

客至從嗔不出迎

散愁二首

前人

久客宜旋旆興王未息戈蜀星陰見少江雨夜聞多百萬傳深入寰區望匪他司徒下燕趙收取舊山河

聞道并州鎮尚書訓士齊幾時通薊北當日報關西戀闕丹心破靄衣皓首啼老魂招不得歸路恐長迷

客至

前人

舍南舍北皆春水但見羣鷗日日來花徑不曾緣客掃

蓬門今始為君開盤飧市遠無魚味樽酒家貧只舊醅
肯與鄰翁相對飲隔籬呼取盞餘盃

遺意二首

前人

轉枝黃鳥近泛渚白鷗輕一徑野花落孤村春水生衰
年催釀黍細雨更移橙漸喜交遊絕幽居不用名
簷影微微落津流脉脉斜野船明細火宿雁聚圓沙雲
掩初弦月香傳小樹花鄰人有美酒稚子夜一作能賒色

漫成二首

前人

野日荒荒白春流泯泯清渚蒲隨地有村徑逐門成只
作披衣慣常從漉酒生眼邊無俗物多病也身輕
江臯已仲夏花下復清晨仰面貪看鳥回頭錯應人讀
書難字過對酒滿壺頻近識我眉老知余懶是真

村夜

前人

蕭蕭風色暮江頭人不行村春雨外急鄰火夜深明胡
羯何多難樵漁寄此生中原有兄弟萬里正含情

早起

前人

春來常早起幽事頗相關帖石防隕岸開林出遠山一
丘藏曲折緩步有躋攀童僕來城市餅中得酒還

畏人

前人

早花隨處發春鳥異方啼萬里清江上三年落日低畏
人成小築褊性合幽棲門徑從榛草無心走馬蹄

遠遊

前人

賤子何人記迷方著處家竹風連野色江沫擁春沙種
藥扶衰病吟詩解歎嗟似聞胡騎走失喜問京華

問斛斯六官未歸

前人

故人南郡去去索作碑錢本賣文為活讐令室倒懸荆
扉深蔓草土銼冷踈烟老罷休無賴歸來省醉眠

蜀人呼盜

銼為

絕句漫興九首

前人

隔戶楊柳弱嫋嫋恰似十五女兒腰誰為朝來不作意
狂風挽斷最長條

眼見客愁愁不醒無賴春色到江亭即遣花開深造次

便教鶯語太丁寧

手種桃李非無主野老牆低還是家恰似春風相欺得
夜來吹折數枝花

熟知茅齋絕低小江上燕子故來頻啣泥點汚琴書內
更接飛蟲打著人

二月已破三月來漸老逢春能幾廻莫思身外無窮事
且盡生前有限杯

腸斷春江欲盡頭杖藜徐步立芳洲顛狂柳絮隨風舞

輕薄桃花逐水流

懶慢無堪不出村呼兒日在掩柴門蒼苔濁酒林中靜

碧水春風野外昏

糲徑楊花鋪白氈點溪荷葉疊青錢筍根稚子無人見
沙上鳬雛傍母眠

舍西柔桑葉可拈江畔細麥復纖纖人生樂何春已夏
不放香醪如蜜甜

歸來

前人

客裏有所過歸來知路難
開門野鼠走散帳壁魚乾洗
杓開新醞低頭拭小盤
憑誰給麴蘖細酌老江干

破船

前人

平生江海心宿昔具扁舟
豈唯青溪上日傍柴門遊
蒼惶避亂兵緬邈懷舊丘
鄰人亦已非野竹獨修修船舷
不重扣埋沒已經秋仰看西飛翼下愧東逝流故者或
可掘新者亦易求所悲數奔竄白屋難久留

到村

前人

碧澗雖多雨秋沙亦少泥蛟龍引子過荷芰逐花低老
去參戎幕歸來散馬蹄稻粱須就列榛草即相迷蓄積
思江漢頑疎惑町畦颸酬知己分還入故林棲

揚旗

二年夏六月成都尹鄭公置酒公堂觀騎士試新旗幟

前人

江雨飖長夏府中有餘清我公會賓客肅肅有異聲初
筵閱軍裝羅列照廣庭庭空六馬入駿駕揚旗旌廻廻
偃飛蓋熠熠迸流星來纏風飈急去擘山嶽傾材歸俯
身盡妙取略地平虹霓就掌握舒卷隨人輕三州陷犬

戎但見西嶺青公來練猛士欲奪天邊城此堂不易升
庸蜀日已寧吾徒且加飧休適蠻與荆

去蜀

前人

五載客蜀郡一年居梓州如何關塞阻轉作瀟湘遊萬
事已黃髮殘生隨白鷗安危大臣在不必淚長流

八哀詩

前人

鄭公瑚璉器華岳金天晶昔在童子日已聞老成名疑
然大賢後復見秀骨清嚴武傳武中書侍郎挺之子神
氣雋爽敏于聞見幼有成人讀

書不究精義涉獵而開口取將相小心事友生

甫與武世契也

其父名而武不忤

呼其

閲書百紙盡落筆四座驚歎職匪父任嫉

邪常力爭

武弱冠以門蔭策名哥舒翰奏充判官至德初肅宗初靖難大功才傑武枝節赴行在宰

相房琯素重之及是首薦

漢儀尚整肅時武為胡騎忽

縱橫

祿山之亂也

飛傳自河隴逢人問公卿不知萬乘出雪

涕風悲鳴受詞劍閣道謁帝肅關城

河隴劍閣肅關城事新舊二史皆不

載寐寢雲臺仗飄颻沙塞旌江山少使者笳鼓凝皇情

壯士血相視忠臣氣不平密論正觀體揮發岐陽征

時肅

宗理兵感激動四極聯翩收二京

二京長安東都也二史皆不載武收復功

西郊牛酒再原廟丹青明匡汲俄寵辱衛霍竟哀榮四

登會府地

既收長安以武為京兆少尹兼御史中丞時年二十三後又還京兆尹兼御史大夫三掌

華陽兵

華陽成都也武以史思明阻兵不之官侵游京師頗自矜大出為綿州刺史遷劍南東川節度使後奉上皇詰以劍南兩川合為一道拜武成都尹充

劍南節度使入復求為方面拜成都尹在蜀累年肆志逞慾行猛政威振一方

京兆空柳色尚書無履聲羣烏自朝夕白

馬休橫行諸葛蜀人愛文翁儒化成公來雪山重公去

雪山輕記室得何遜韜鈴廷子荆四郊失壁壘

失壁壘言無出

成也此美武能鎮靜也

虛館開蓬迎堂上指圖畫軍中吹玉笙豈

無成都酒憂國只細傾時觀錦水釣問俗終相并意待
犬戎滅人藏紅粟盈以茲報主願庶或裨世程炯炯一心在沉沉二豎嬰顏回竟短折賈誼徒忠身飛旐出江漢孤舟轉荆衡虛無馬融笛悵望龍驤瑩空餘老賓客
身上媿簪纓

杜工部蜀中離筵

唐李商隱

人生何處不離羣世路干戈惜蹙分雪嶺未歸天外使

松州猶駐殿前軍座中醉客延醒客江上晴雲雜雨雲
美酒成都堪送老當壚仍是卓文君

和蜀縣段明甫秋城望歸朝 唐錢起

製錦蜀江靜飛鳬漢闕遙一茲風靡草再視露盈條旅
望多愁思秋天更次寥河陽傳麗藻清韻入歌謠

蜀國偶題

唐錢珝

忽憶明皇西幸時暗傷潛恨竟誰知佩蘭應語宮臣道
莫向金盤進荔枝

成都為客作

唐田澄

蜀郡將知遠城南萬里橋衣緣鄉淚濕貌以客愁銷地富
魚為米山芳桂是樵旅遊惟得酒今日過明朝

蜀人為南蠻俘虜四首

唐雍陶

但見城池還漢將豈知佳麗屬蠻兵錦江南渡聞遙哭
盡是離家別國聲

大渡河邊蠻亦愁漢人將渡盡回頭此中郵寄思鄉淚
南去應無水北流

越雋城南無難地傷心從此便為蠻冤聲一慟悲風起
雲暗青天下山

雲南路出陷河西毒草長青瘴色低漸近蠻城誰敢哭
一時收淚羨猿啼

蜀中戰後感事

前人

蜀國英靈地山重水又回文章四子盛道路五丁開詞
客題橋去忠臣叱馭來卧龍同駛浪躍馬比浮埃已與
無妖土那知有禍胎蕃兵依漢柳蠻旆指江梅戰後悲

逢血燒餘更見灰空留犀獸怪無復酒除災歲積長洪
怨春深杜宇哀家貧移未得愁上望鄉臺

蜀中經蠻後寄雍陶

唐馬乂

酋馬渡瀘水北來如鳥輕幾年期鳳闕一日破龜城此
地有征戰誰家無死生人悲還舊里烏喜下空營弟姪
意初定交朋心尚驚自從經難後吟苦似猿聲

獨愁

唐李崇

聞道成都酒無錢亦可求不知將樂許銷得此來愁

郭震蜀人賦東郊詩因走京師言蜀將亂後果
有李順之變

今日出東郊東郊好春色青青原上草莫教征馬食

將歸二首

宋祁

遠假西南守三逢梅柳新衰令宦情薄老惜歲華頻
耶釀工銷日巴禽巧喚春離家何所恨雁後作歸人隋薛道衡

云人歸
落雁後

雲棧短長亭今茲重作經邛崃叱殘馭蜀分使回星旅

鬚雙垂雪羈懷一泛萍驥駒在門久此曲若為聽

思賢閣圖予真愧而成詠

前人

忝中二千石罷去輒圖真揆予本完士早蒙善養仁執
笏班華位飛綏侍邃宸如何金紫服乃裹丘壑身西南
一面重竭來駕朱輪牽拙歲再朞初無德在民形象安
足紀崖略聊自陳質陋眸子瞭志泰眉宇伸誰謂彼已
子而傳阿堵神爵里三十八自參預呂公而下凡四十
一人雷太尉張尚書程樞
副皆再至赫赫多名臣瞻前謝前哲垂彼慙後人

梵安寺內浣溪四老唱和詩并序 楊咸章

伏覩益之奉議尊兄欲於浣花梵安寺之普賢約
漢公子臧作三老會又築堂繪榜曰三老誠蜀中
之盛事咸章方調官武信敢卜謝事少陪雅集輒
更為四老因賦拙詩上浼清覽

聞說懸車三老儒約為繪象訪僧居蟠蟄杯酒歡無極
鳴足韜裘樂有餘暑簾共觀岷嶺雪春盤同膾蜀江魚
歸來一榻如相許湏信逍遙倍二疎

宗弟晦之通直有詩陳武信三老歸蓬三老之後損之喜繼元韻以勉之 楊損之

未拋名利尚區區方卜榮遷武信居思蓬林泉三老後已經年紀七旬餘且來在野同遊廩莫學臨淵却羨魚子美堂鄰願為約免教朋友舊情踈

傑衰朽無取辱益之見招同諸友為四老會晦之承議有詩傑謹次元韻 任傑

夫子關西出衆儒肯來尋我卜幽居子美詩肯來尋一老忘憂棋

局真佳趣投老詩篇是緒餘故舊已蒙吟伐木太平只恐
罩嘉魚主人醉指前溪路采菊清涼月影踈

武仲伏承益之奉議轉示晦之佳什謹依元韻

次和

楊武仲

素髮厖眉一陋儒常陪龍友到禪居我隨益者誠多幸
人歎賢哉愧有餘座上共飛純玉斝腰間齊佩白銀魚
高吟清論長終日會數朋情信不踈

昨日漢公承議見召與三老友談笑大醉退而

作詩少謝勤意

呂陶

六十年前里巷遊。北歸重此接交儕。據鞍罿鑠誇朱絞。
把酒殷勤勸白頭。况是三春逢美景。何妨一笑斷多愁。
閒中歲月非難遣。須得新詩事唱酬。

傑伏蒙知府給事寵示佳章謹依元韻和呈

任傑

險阻艱難自徧遊。歸來尋訪老交儕。七年弦頌嗟分袂。
二月鶯花喜聚頭。美酒十分須共醉。勞生一夢更何愁。

况君富貴功名在從此男兒志可酬

謹次元韻呈嚴釣給事

楊損之

萬里歸陪老客遊
燦然雅什遺朋儔
雲咸響亮清盈耳
霜雪續紛白滿頭
三益畫開裨古意
是日有三益畫
千鍾酒飲
破春愁勸君莫倦柔榆景
未得為霖志未酬

承漢公承議頒示佳章謹次元韻 楊武仲

當年臺閣仰英遊
此日還鄉接舊儔
共喜故人攀鳳翼
佇膺新詔覲螭頭
清歡且盡三春樂
閒飲能消五載愁

夸聽郢中歌白雪敢將巴曲強論酬

廣都道中作

李新

萬花纖籬凡幾曲繡帳處處圍茆屋家貧張日無羅幕
東風吹開莫吹落居人應笑行客癡春去春歸殊不知

多病簡出偶成呈鄆令張盤公大夫

楊天惠

相從一笑忘蹉跎三過秋風錦水波遊子依人仰眉曉
令兄愛客費絃歌思歸仙鶴方驚露欲起病鳬還避羅

共感烏紗能愛老長長遮護兩蒼皤

君義老兄常指其中戲曰吾儕當感渠

渠

出游

劉望之

漫有游隨意何曾語展眉琴臺悲犬子江路憶熊兒修竹蕭蕭寺平蕪淺淺陂年來底事業訪古但饒詩

發成都

前人

落拓平生載酒行如今憔悴鬢絲生無金得買青樓笑空負閑愁出錦城

欲洗羈愁只自醒
邛筒酒好信虛名江陽春色論千戶
價比西州却未輕

一夜孤舟浪打頭
不容客夢到滄洲
誰言江上煙波急
未抵歸心一半流

久留少城

前人

好去相羊烏角巾
却來躡踏軟紅塵
酒因覓睡方成醉
金為收書更覺貧
屢入草堂難下語
少留藥市恐逢人
可憐弔古淒涼意
只向揚家往返頻

子雲故居不復來遊矣

成都即事

何耕

零落紅成陣扶疎綠結幃簡書留客住風雨卷春歸是處羈懷惡浮生樂事希錦江拚盡醉欲典却無衣

正月二十七日侍二老人出萬里橋游寶歷寺

謁五丈天王至合江亭登小舟往來江中日晚

出舟憇臥柳亭以歸記所見

前人

城中少樂事日日走塵土因循嘉節過春物遽如許駕言遊近郊及此新過雨梨花雪飄零來脚浪掀舞傷心

梅已葉慰眼杏初吐荒涼入古寺迢遙行兩廡耽耽巨
入閣擐甲碩且武出門詣支徑信馬踏江滸小舟呼未
至危亭憇方午長江渺無際遠岫明可數舟中更奇絕
一視隘天宇深流風浩蕩淺岸石齟齬水鳧貞自適修
竹不知主搖搖打魚艇丁丁造船斧林疎見官道路轉
失前浦竒觀非一狀四面皆可取斗酒不妄傾佳處輒
自舉杯盤漸狼藉野菽旋燒煮夷猶興未盡落日挂村
塢歸塗遙城隈醉眼迷處所卧柳久知名敗屋費撐拄

此亭輕盈楚宮樣何事腰傴僂臨風發浩歎空響答人
語吾親俱老矣君羨未嘗覩聊為半日樂少慰一生苦
餘年願長健綵服看兒女此外吾何求窮通任天與

九月十九日衙教回留大將及幕屬飲清心堂

觀晚菊分韻得躁字

范成大

甲光射層雲雨脚不敢到西山明古雪秋日一竿照先
偏井絡密後拒參旗掉分弓滴博平鳴劍伊吾小君看
天山箭狐兔何足了閑邊吾豈敢自治有余巧歸來翠

帷卷聊共黃花笑
雖無落帽風亦復接離倒余閑校筆
陣刻燭龍蛇掃毛錐乃更勇我亦鼓旗謠

曉起

前人

黠鼠緣鈴索飢鴟喙井欄不眠秋漏近多病曉屏寒咄
咄渠何怪休休我自闌牙門朝日上簫鼓報平安

船齋晚憩

前人

心作萬緣起境生千刱忙誰同油幕靜獨對篆烟長有
盡天魔力無窮海印光雨餘弦月上塵界本清涼

秋雨快晴靜勝堂席上

前人

一笑憧憧雁鶩行簿書堆裏賦秋陽心如墜絮沾泥住
身似飛泉漱石忙雨後蹲鴟先稻熟霜前浮蟻鬪餵香
天涯節物遮愁眼且復隨鄉便入鄉

秋老四境雨已沛然晚坐籌邊樓方議祈晴樓
下忽有東界農民數十人訴山田却要雨須長

吏致禱感之作詩

前人

歲晚羈懷有所思秋來病骨最先知鏡中公案已甘老

紙上課程休諱癡西堰頗聞江漲急東山猶說雨來遲
錦城樂事知多少憂旱憂霖蹙盡眉

西樓夜坐

前人

抗塵懷抱若為寬繞屋蛙聲亦在官巖桂無香秋遂晚
江鱸有約歲將寒文書散亂嘲癡絕燈火淒清語夜闌
病倦百骸非復我但思禪板與蒲團

明日分弓亭按閱再用西樓韻 前人

眼看白露點蒼苔歲月流光首屢回老去讀書隨忘却

醉中得句若飛來聞雞午夜猶能舞射雉西郊不用媒
自笑支離聊復爾丹心元未十分灰

海雲回按驍騎於城北原時有吐蕃出沒大渡

河上

前人

古道風沙卷夕霏小江煙浪皺春漪天於麥隴猶惺雪
人向梅梢大欠詩頓轡青驥飛脫兔離弦白羽歛寒鷗
牙門列校俱剽銳檄與河邊禿髮知

病中聞西園新花已茂及竹逕皆成而海棠亦

未過

前人

梅塢桃煙研竹初三旬高卧信音踈春雖與病無交涉
雨莫將花便破除祇合蘧蘧隨夢去何須咄咄向空書
頗聞蜀錦猶相待去歲今朝已雪如

春晚卧病故事都廢聞西門種柳已成而燕官
海棠亦爛漫矣

前人

軒牕深窈似禪房竟日虛明裊斷香詩債無邊春已老
睡魔有約晝初長市橋煙雨應官柳墟苑池臺自海棠

游騎行歌莫相笑鰲頭六結已龜藏

病起初見賓僚時上疏丐祠未報 前人

浪將冠服衣猿狙因病偷閑稍自如時有好懷誇得句
略無情話怕回書邊城晏閉稀傳箭村巷春遊未荷鋤
過此良辰公事少天恩儻許賦歸歟

訪古

房偉

訪古城西話刦灰子雲相如安在哉成都萬事變亦盡
惟有石筍雙崔嵬

紀申提學高行 鄭人

孫松壽

憶昔兒童飽梨栗班衣偃伏先君側每聞正色說我翁
口口奇奇長太息先君墓草今芊芊尚想遺言過庭日
恨無佳傳掬芳馨洗我肝心百非僻一朝幽鎬晃入手
利忍如懷夜光璧男兒大節要奇偉一日成就天所錫
我翁當年鸞鶴離一別舊巢無處覓桑弧射處掩蓬蒿
獨把宵衣飛俊翮楊宗不絕僅如線大義欲歸歸不得
凝香夜半禱靈空願楊有子歸宮室果然天助兩飛鴻

翁喜當興子雲宅絳霄回首擬歸來撫我恩深重嗟惜
棄官十載營旨甘送死養生無一失寸心安矣指白雲
百拜雙親淚濡席茅簷雖陋生處所此心不以萬鍾易
幾年夜淚濕衾裯今作兒啼情自適登堂悲喜動行人
里巷喧呼手加額珠還合浦已無憾老蚌沙泥忍遺逸
窮簷忽見相抱持孺慕丹心始云畢一子來歸詠白華
三家孝愛融春色雍容去就良可觀無乃扶持有神物
始知造化惜頽波界以難能令一出玉堂丈人風教手

一日得之幾折屐何不薦之陛下聖蜀有孝子聲藉藉
奇人異行感至尊鳳詔褒華寵其實人間一日傳萬口
坐使澆風四方激僉謀方欲置廊廟病卧王州嗟易簣
短生夢幻何足悲此念未隨生死隔百身莫贖歎朝露
端合天公任其責真人慨念錄其孤椽筆大書光史策
丈夫乃爾亦何憾鬼哭人號空怨憶蕭蕭綠野長安道
萬里羈魂動行客只令四海歸宗議字字秋霜凜寒日
一言我欲招翁魂香骨有靈宜可格聖朝當今以孝治

好樹豐碑旌潔白磨崖百丈置巖阿當有山靈夜呵詰
諸郎況是足風規請叩帝闈為此策長使千秋孝子碑
屹與岷峩我對翁室

靈泉道中

楊申

荒雞不知林落日鳴鴉背山行曲折盡稍出喬木外前
峯近相向禿缺不可蓋石泉微斷續渚澤亦多派牛羊
深墟落稚子翳蓬艾稻秧碧剗剗遮隴無疆界今年田
夫喜飽飯我亦快猶慚食無功舉箸再三餬何當磨腰

鎌助爾艾稊稗

遊山上廢寺有段文昌種松石刻云乾坤毀則無以見寺寺不可毀四松其遠乎寺今廢木亦亡矣感而賦之

前人

木落石出荒山臺上有佛寺孤崔嵬斷椽折瓦無四壁古佛已倒何人推野蜂占窠挾肩背山鼠出穴銜鬚老僧見我欲愁哭野葛蔽路官能來文昌種松有斷刻石柱半裂荒苔苔老翁鼻祖無一在獨樹晚出非耆韶

乾坤未變已先滅樂見賊火翻狂雷至今野叟鑿山破
石窟尚有龍筋骸當時手種意已遠欲與草木為渠魁

成都學舍遣興五首

李燾

久客墮塵土幽居懷翠微只餘清夜夢長作故山歸菊
已開三徑松應長十圍晨鐘忽驚覺猶有露霑衣

寂寥三秋節淒涼萬里風關河盡形勝人物幾英雄秦
葉隨流水周末滿故宮此心懸魏闕夢遠浙西東
壯矣府中縣索如城外村墨池今掃迹石筍舊餘根風

急漢絃斷雨多秦鏡昏新秋一懷古情緒若為論

雨意忽如此客愁將奈何出門誰可詣掩卷獨高歌塵
世鬼三穴古人蓬一窯區區奚足道默默幸無它

長憶在家好已知從仕難紛紛猶嚇鼠悄悄政棲鸞忘
意躡高位敢言卑小官世途真甚隘懷抱要須寬

游海雲山

喻汝礪

渺渺天宇初便復有此山清辰及茲游遐想有代前來
者幾何人當時各為歡淋質揚妙舞哀絲遲清彈樂事

坐如昨芳歲已屢彈向來所游人落葉不復還迥然散遠目感之為長歎竹遙舊所落巢豈昔時眠念誰當久存而不住所緣破涕聊一怡山川却萎妍未知後世士誰復當來旋

錦江思

前人

獨詠滄浪古岸邊牽風柳帶綠凝煙得魚且斫金絲鱠醉折桃花倚釣船

成都文類卷十四

欽定四庫全書

成都文類卷十五

宋扈仲榮等編

詩

道釋

前蜀楊飭好道術後主以其妖怪戮之西市臨

刑有詩言後主失國

聖主何曾識仲都可憐社稷在須臾市西便是神仙窟

何必乘槎泛五湖

偽蜀丁元和詩

九重城裏人中貴五等諸侯閨外尊爭似布衣雲水客
不將名利挂乾坤

爾朱先生還丹歌贈偽蜀醫藥院判官胡德榮

欲究丹砂訣幽玄無處尋不離鉛與汞無出水中金金欲制
時須得水水遇土兮終不起但知火候不參差自得還丹微
妙理人世分明知有死剛只留心戀朱紫豈知光景片時間

將為人生長似此何不回心師至道免逐年光虛自老臨樽
只覺醉醺酣對鏡不知漸枯槁二郎一郎聽我語仙鄉咫尺
無寒暑與君說盡只如斯莫戀驕奢不肯去感君恩義言方
苦火急迴心求出路吟成數句贈君詞不覺便成今與古

蘇幕遮

紹興間

韓仙姑

不憂貧不戀富大悟之人開着波羅鋪內有真如無價
寶欲識真如正照菩提路貪愛心須除去清淨法身直
是堪憑據忍辱波羅為妙藥服了一圓萬病都新愈

歌謡

廉叔度歌

後漢書曰廉范字叔度建初中為蜀郡太守成都
民物豐衍邑宇逼側舊制禁民夜作以防火災而
更相隱蔽燒者日屬范乃毀削先令但嚴使儲水
而已百姓為便乃歌之云

廉叔度來何暮不禁火民安作平生無襦今五袴

後漢時蜀中童謡

後漢書五行志曰世祖建武六年蜀中童謡是時
公孫述僭號於蜀時人竊言王莽稱黃述欲繼之
故稱白五銖漢家貨明當復也述遂誅滅

黃牛白腹五銖當復

唐咸通末成都童謡

新唐書五行志曰咸通十四年成都有童謡是歲
歲陰在巳明年在午巳蛇也午馬也

咸通癸巳出無所之蛇去馬來道路稍開頭無片瓦地

有殘灰

梁太祖時蜀中謠

五代史曰劉知俊初事梁太祖後奔蜀王建雖加寵待然亦忌之常謂近侍曰劉知俊非爾輩能駕馭不如早為之所有嫉之者於里巷間作此謠知俊色黑丑生棧繩者王氏子孫皆以宗承為名故以此猜疑之遂見殺於成都

黑牛在圈棧繩斷

無題

五五復五五五逾重數浮世若浮雲真石一如故與
君相見時杳杳非今土

右詩見於羅城北門壞碑上有乾符三年高駢名
銜餘字斷缺莫知其為何詩也辭隱義闕故附見
民謠之末

宮詞

蜀花藥夫人者本青城費氏以才色嬖于後主嘗

效王建作宮詞百首國亡入後宮太祖聞之召使
陳詩誦其國亡詩云君王城上揭降旗妾在深宮
那得知十四萬人齊解甲寧無一個是男兒太祖
悅蓋蜀兵十四萬耳此陳無已所書也王平甫在
崇文院錄其宮詞十數篇因叙之曰熙寧五年臣
安國奉詔定蜀民楚民秦民三家所獻書可入三
館者令令史李希顏料理之其書多剥脫而得一
敝紙所書花蘂夫人詩筆書乃出於花蘂手而詞

甚奇與王建宮詞無異建詞自唐至今誦者不絕
口而此獨遺弃不見取前受詔定三家書者又斥
去之甚可惜也臣令令史郭祥繕寫入三館而歸
口誦數篇於丞相安石明日與中書語及之而王
珪馮京願傳其本於是盛行於時花藥者偽蜀孟
昶侍人事在國史平甫所叙云爾平甫稱花藥事
見國史今國史乃無花藥事不知平甫何所見也
宮詞才二十八首今附左方亦以見當時游衍借

侈云

五雲樓閣鳳城間花木長新日月閒三十六宮連內苑

太平天子坐崑山

會真廣殿約宮牆樓閣相扶倚太陽淨梵玉階橫水岸

御爐香氣撲龍床

龍池九曲遠相通楊柳絲牽兩岸風長似江南好春景

畫船來去碧波中

東內斜陽紫禁通龍池鳳苑夾城中曉鐘聲斷嚴粧罷

院院紗牕海日紅

殿名新立號重光島上亭臺盡改張但是一人行幸處
黃金閣子鎖牙床

安排諸院接行廊水檻周四十里強青錦地衣紅錦毯
盡鋪龍腦鬱金香

夾城門與內門通朝罷巡遊到苑中每日日高祇候處
滿堤紅艷立春風

厨船進食簇時新侍坐無非列近臣日午殿頭宣索鰣

隔花催喚打魚人

立春日進內園花紅葉輕輕嫩淺霞跪到玉階猶帶露
一時宣賜與宮娃

三面宮城盡夾牆苑中池水白茫茫亦從獅子門前入
旋見亭臺遙峯傍

離宮別院繞宮城金板輕敲合鳳笙夜夜月明花榭底
傍池長有按歌聲

御製新翻曲子成六宮纔唱未知名盡將觱篥來抄譜

先按君王玉笛聲

旋移紅樹斷青苔
宣使龍池再鑿開
展得綠波寬似海
水心樓殿勝蓬萊

太虛高閣凌波殿
背倚城牆面枕池
諸院各分娘子位
羊車到處不教知

修儀承寵住龍池
掃地焚香日午時
等候大家來院裏
看教鸚鵡念新詩

才人出入每相隨
筆硯將行遠曲池
能向彩牋書大字

忽防御製寫新詩

六宮官職捲新除
宮女安排入畫圖
二十四司分六局
御前相見錯相呼

春風一面晚粧成
偷折花枝傍水行
却被內嬪遙覲見
故將紅豆打黃鸝

黎園弟子簇池頭
小樂携來候燕遊
旋炙銀笙先按拍
海棠花下合梁州

殿前排燕賞花開
宮女侵晨採幾回
斜望花開還舉袖

傳聲先喚近臣來

小毬場近曲池頭宣喚勲臣試打毬先向畫廊排御幄
管絃聲動立浮油

供奉頭籌不敢爭上棚專喚近臣名內人酌酒纔宣賜
馬上齊呼萬歲聲

殿前宮女搯纖腰初學乘騎怯又嬌上得馬來纔似走
幾回拋鞋把鞍橋

自教官娥學打毬玉鞍初跨柳腰柔上棚知是官家認

遍遍長贏第一籌

翔鸞閣外夕陽天木影花光水接連望見內家來往處

水門斜過罨樓舡

內人追逐採蓮時驚起沙鷗兩岸飛蘭棹把來齊拍水
並船相閨濕羅衣

新秋女伴各相逢罨畫船飛別浦中旋折荷花半歌舞
夕陽斜照滿衣紅

月頭支給買花錢滿殿宮娥近數千遇著唱名多不應

含羞急過御床前

吳曾能改齋漫錄云徐匡璋納女子孟昶拜貴妃
別號花蘂夫人意花不足擬其色似花蘂羈輕也
又升號慧妃以號如其性也王師下蜀太祖聞其
名命別護送途中作詞自解曰初離蜀道心將碎
離恨綿綿春日如年馬上時時聞杜鵑三千宮女
皆花貌妾最嬢娟此去朝天只恐君王寵愛偏陳
無已以夫人姓費誤也

罰赴邊有懷上韋相公

唐薛濤

聞道邊城苦而今到始知却將門下曲唱與隴頭兒

薛濤本長安良家女父鄭因官寓蜀而卒濤以能詩聞後韋臯鎮蜀召令侍酒議以校書郎奏請之護軍曰不可乃止濤出入幕府自臯及李德裕凡歷事十一鎮以詩與濤唱和者元稹白居易牛僧孺令狐楚裴度嚴綬張籍杜牧劉禹錫吳武陵張祐餘皆名士凡二十一人濤詩不傳獨得此四句

故附見宮詞之後

鬼謠

高駢築羅城多發掘古冢取輓楚城有滄州守禦
指揮使姜知古者當掘一冢夜有鬼嘯於冢上因
獻一書詞旨哀切其書曰冥司趙畚謹以幽昧致
書於守禦指揮端公閣下竊以趙氏之冤搏膺入
夢良夫之枉被髮吁天是以有怨必讐無道則見
此則流於往史載在前文如畚也一介遊魂九泉

罔象德不勝饗禱不勝人無廟貌於世間遂湮沉
於泉壤自蒙天譴使掌冥司雖叨正直之官未達
聰明之理未嘗以威服衆唯知以禮依人頃至本
朝叨為上相不無濫德敢有害盈今者伏審渤海
高公令君毀畚墳闕况畚謫居幽府天賜佳城平
生無戰伐之讎邂逅起誅夷之疊得不撫銘旌而
憤志託觚染以申懷伏希端公俯念無依迫垂有
鑒特於萬雉免此一坏儻全馬鬣之封敢忘龍頭

之底謹吟五言四句詩一章後幅上聞不勝望德
之至謹白詩曰

我昔勝君昔君今勝我令人生一世事何用苦相侵
楊蘊中以罪入成都獄夜夢一婦人曰吾薛濤之
流也頃幽死此室乃贈蘊中一絕句

玉漏深長燈耿耿東牆西牆時見影月明窗外子規啼
忍使孤魂良夜永

陳甲字升父隆州人紹興間為蜀帥李公彥之客

館於雙竹齋夜見數婦笑語有吟兩絕句者因忽
不見

晚雨廉纖梅子黃晚雲卷雨月侵廊樹陰把酒不成飲
說着無情更斷腸

舊時衣服盡雲霞不到迎仙不是家今日樓臺渾不識
祗因古木記宣華

成都文類卷十五

欽定四庫全書

集部

成都文類卷十六至八

詳校官左中允臣塘五珠

助教臣常循覆勘

總校官知縣臣繆琪

校對官編修臣邱庭澤

謄錄監生臣毛金潮

欽定四庫全書

成都文類卷十六

宋扈仲榮等編

詔策 鐵券 故文 犀

漢先主封張飛策

章武元年遷飛車騎將軍領司隸校尉封西鄉侯策

曰

朕承天序嗣奉洪業除殘靖亂未燭厥理今寇虜作害

民被荼毒思漢之士延頸鶴望朕用怛然坐不安席食不甘味整軍誥誓將行天罰以君忠毅侔蹤名虎名宣遐邇故特顯命高墉進爵兼司于京其誕將天威柔服以德伐叛以刑稱朕意焉詩不云乎匪疚匪棘王國來極肇敏戎功用錫爾祉可不勉歟

封馬超策

章武元年遷驃騎將軍領涼州牧進封黎鄉侯策曰朕以不德獲繼至尊奉承宗廟曹操父子世載其罪朕

用慘怛疚如疾首海內怨憤歸正反本暨于氏羌率服
獯鬻慕義以君信著北土威武並昭是以委任授君抗
鷹虓虎兼董萬里求民之瘼其明宣朝化懷保遠邇肅
慎賞罰以篤漢祜以對于天下

許靖策

建安十九年先主克蜀以靖為左將軍長史先生為
漢中王靖為太傅及即尊號策靖曰

朕獲奉洪業君臨萬國夙宵惶惶懼不能綏百姓不親

五品不遜汝作司徒其敬敷五教五教在寬君其勗哉
秉德無怠稱朕意焉

後主告諭伐魏詔

建興五年春丞相亮出屯漢中營沔北陽平石馬三

月下詔曰

朕聞天地之道福仁而禍淫善積者昌惡積者喪古今
常數也是以湯武脩德而王桀紂極暴而亡曩者漢祚
中微網漏凶愚董卓造難震蕩京畿曹操階禍竊執天

衡殘剥海內懷無君之心子丕孤豎敢尋亂階盜據神器更姓改物世濟其凶當此之時皇極幽昧天下無主則我帝命隕越于下昭烈皇帝體明敵之德光演文武應乾坤之運出身平難經營四方人鬼同謀百姓與能兆民欣戴奉順符識建位易號丕承天序補弊興衰存復祖業膺誕皇綱不墜于地萬國未靖早世遐殂朕以幼冲繼統鴻基未習保傳之訓而嬰祖宗之重六合壅否社稷不建永惟所以念在匡救光載前緒未有攸濟

朕甚懼焉是以夙興夜寐不敢自逸每崇菲薄以益國用勸分稼穡以阜民財授才任能以參其聽斷思降意以養將士欲奮劍長驅指討凶逆朱旗未舉而不復墮喪斯所謂不然我薪而自焚也殘類餘醜又支天禍恣睢河洛阻兵未弭諸葛丞相弘毅忠壯忘身憂國先帝託以天下以勗朕躬今授之以旄鉞之重付之以專命之權統領步騎二十萬衆董督元戎恭行天罰除患寢亂克復舊都在此行也昔項籍拏一疆衆跨州兼土所

務者大然卒敗垓下死於東城宗族如焚為笑千載皆
不以義陵上虐下故也今賊微尤天人所怨奉時宜速
庶憑炎精祖宗威靈相助之福所向未克吳王孫權同
恤災患潛軍合謀掎角其後涼州諸國王各遣月支康
居胡侯支富康植等二十餘人詣受節度大軍北出便
欲率將兵馬奮戈先驅天命既集人事又至師貞勢并
必無敵矣夫王者之兵有征無戰尊而且義莫敢抗也
故鳴條之役軍不血刃牧野之師商人倒戈今於麾首

路其所經至亦不欲窮兵極武有能棄邪從正簞食壺
漿以迎王師者國有常典封寵大小各有品及魏之宗
族支葉中外有能規利害審順逆之數來詣降者皆原
除之昔輔過絕親於智氏而蒙全宗之福微子去殷項
伯歸漢皆受茅土之慶此前世之明驗也若其迷沉不
反將助亂人不式王命戮及妻孥固有攸赦廣宣恩威
貸其元帥弔其殘民他如詔書律令丞相其露布天下
使稱朕意焉

後主復諸葛亮丞相策

建興六年亮使馬謖督諸軍與魏張郃戰于街亭謖違亮節度舉動失宜大為郃所破亮戮謖以謝衆上疏曰臣以弱才叨竊非據親秉旄鍼以勵三軍不能訓章明法臨事而懼至有街亭違命之闕箕谷不戒之失咎皆在臣授任無方臣明不知人恤事多闇春秋責帥臣職是當請自貶三等以督厥咎於是以亮為右將軍行丞相事所總如前冬亮復出散關圍陳倉破魏軍斬王雙

七年遣陳戒攻魏武都陰平魏郭淮率衆欲擊戒亮自出至建威淮退還遂平二郡詔策亮曰

街亭之役咎由馬謖而君引愆深自貶抑重違君意聽順所守前年燿師馘斬王雙今歲爰征郭淮遁走降集氏羌興復二郡威震凶暴功効顯然方今天下騷擾元惡未枭君受大任幹國之重而久自挹損非所以光揚洪烈矣今復君丞相君其勿辭

後主謚陳祗詔

景耀元年卒後主痛惜發言流涕乃下詔曰

祗統職一紀柔嘉惟則幹肅有章和義利物庶績允明命不融遠朕用悼焉夫存有令聞則亡加美謚謚曰忠侯

唐僖宗賜高駢築羅城詔

勑高駢省所奏脩築羅城畢功并進畫圖事具悉卿天平急召井絡專征臨邛夢叶於四刀按部恩覃於兩劍上言大鎮空有子城殊百雉之環迥是千年之曠闕便依陳奏未隔寒暄每日一十萬夫分築四十三里皆施

廣廈又砌長磚城角曲收逸迷攻而勢勝甕門直捷容
拒守之兵多利及後人智高前古繼孔明於掌內坐張
儀於腹中是以輕笑木牛感通金馬增上頭之睥睨架
裏面之闌干橋象七星不移舊峙錦蓬三月可濯新壕
役徒九百六十萬工計錢一百五十萬貫卓哉懋績固
我雄藩罄府庫之資儲捨陰陽之拘忌但為國計惄忘
身謀並無黎庶之怨嗟不請朝廷之接借忽聞進奏言
已畢功見圖寫之甚明與神化而急速方念處身廉潔

報國忠貞始終能協于一心清美久聞于萬口欲人檢
驗具見公忠朕已知臣何勞請使便欲寵渥恐卿自往
雅州既發師徒方勞館驛且留賞典專俟迴軍蜀川既
及於春風蠻寇盡離於河岸便酬勲績各進官階未間
勉効七擒佞性三捷故茲詔示想宜知悉冬寒卿比平
安好遣書指不多及

唐僖宗賜節度使陳敬瑄鐵券

廣明四年冬僖宗在劍南是冬賜功臣劍南西川節度

副大使知節度事統押近界諸蠻及西山八國雲南
安撫制置營田處置等使開府儀同三司守太師兼
中書令成都尹上柱國潁川郡王食邑三千戶實封
四百戶陳敬瑄鐵券曰

烹巨鰐者鼎大於滄海斬長鯨者劍倚於青天既立異
勲克膺殊寵李晟免其六死子儀成其九功鏤以金鏽
賜其鐵券後來繼者豈在他歲寒知松柏之心國難
見忠貞之節卿五嶽鎮地一柱擎天氣壓乾坤量含宇

宙自居環衛出擁旌幢諭清政而冰鏡無光吐赤誠而朝霞失色手持玉節身鎮錦城扶乾綱則萬國齊心總坤維而百蠻繞指三川欽化一境歸仁朕自稅駕褒斜省方邛蜀匍匐而來迎鳳輦馳驅而速建龍宮百辟來朝萬方入貢夏禹塗山之會未盛於斯漢高沛國之歡無過於此穢悍能如剪草除莠易若焚巢不讓武侯之勲無愧文翁之化海東獻款雲南投誠九穀豐登三農務盛濟贍軍國拯救朝僚內竭家財外罄公帑千官感

德一國推功今則巨猾奔逃神州克復將歸上國即別
成都致朕身安由卿忠蓋前封公爵後賜郡王詢於衆
情未愜羣望今賜卿鐵券捨其十死望太山而立誓指
黃河以為盟山無盡時河無竭日君君臣臣父父子子
永遠貴昌並皆如然

唐昭宗賜王建詔

乾寧元年八月昭宗幸石門建奉表起居貢御衣寶
器等使回賜絹詔建得詔泣下率兵赴難

朕以眇身託于人主皇天不佑寇難荐興外無桓文內無平勃每一念此芒刺在懷卿忠義貫日至誠許國三川不寧一麾已定清淨中原再造我國家朕有望于卿也

又賜御劄

光化二年昭宗詔建私門立戟加中書令封瑯琊王四年封西平王遣使賜建玉帶金器朱書御劄其略

曰

朕罹此多難播遷無常旦夕慄慄不能自保而况保天下事為朕藩護有望于卿也

又賜詔

朕去年在鳳翔與茂貞熟計誅韓全誨等以謝全忠崔
胤固請廢兩軍盡去北司朕止欲誅有罪之人全忠胤
必欲盡殺朕方危迫不得不從而胤與鄭元規朋助全
忠間諜誘惑欲起兵收鳳翔次及西川天人助順崔鄭
就誅昨正月二十日朕御樓撫慰軍民告以某等罪狀

宰臣裴樞等受全忠密旨亟奏鳳翔川軍已及咸陽脅
朕遷洛後二日東兵擁朕出長安朕與后妃宗室吏民
匍匐就道艱苦萬狀六軍偕廢朕益孤危再賜茂貞密
詔使告卿糾合諸鎮共迎朕西歸偵知全忠遷朕至洛
盡斥內外侍衛雖有書詔不復可通藩鎮諸侯或信偽
詔疆者歸之則賊勢轉盛卿自先帝時立功數助朕征
討受賊誣構寧不冤憤計此賊必先討鳳翔次及卿與
河東然後取天下卿安忍負高祖太宗三百年德澤而

東平黃巢餘黨宜亟告茂貞繼徵克用行密及襄幽鎮
魏同舉勤王之師迎朕還京朕兵盡力窮危及宗社臨

軒西望灑血告卿

置史官詔 永平二年

自古王者之興善惡之迹不泯者有史臣傳之丹青載
之平章事張格儒術領袖文高於世著述之體自侔班
馬可專編纂開國已來實錄

置東宮官屬詔

永平四年以其子行判內外六軍事詔曰

王者經世馭民以保安于蒸人曷嘗不講求賢碩以輔元子故漢開博望唐承重華左右正人自躋于治其以東宮為崇賢府凡文學道德之士得以延納訪問無忽自尊以蔽爾之聰明

王衍試制科策文 乾德四年

炎漢致治始策賢良巨唐思皇爰求茂異講邦國治亂之體陳天人精祲之原豈角虛文蓋先碩德朕念守器

之重識為君之難思得奇才以凝庶績因舉故事以紹
前脩子大夫抱道逢時授策應詔必有長策以副虛懷
何以使三農樂生五兵不試刑獄無枉賦歛無加以何
策可以定中原以何道可以卜長世朕當親覽汝無苟
從

白衣蒲禹卿對策其略曰今朝廷所行者皆一朝一
夕之事公卿所陳者非乃子乃孫之謀暫偷目前之
安不為身後之慮衣朱紫者皆盜跖之輩在郡縣者

皆狼虎之人姦佞滿朝貪淫如市以斯求治是謂倒行執政皆切齒欲誅之衍以其言有益擢為右補闕

後唐收蜀勅

朕以蜀郡封疆本是我唐境土爰從兵革遠退江山當偽梁篡殺之時致宗廟凌夷之難遂茲割據蓋逐便安雖行建號之謀乃是從權之道况復蜀主先父素是本朝舊臣常懷忠孝之心每俟興隆之運唯期恢復却效傾輸朕以初殄寇讎重興社稷撫諭之恩既廣憂勤之

意常深須務綏和貴諧混一遂令元子秉命宰臣遠安
僕后之心既叶來王之願遐想王師行李已及彼地城
池遠降詔書明行示諭料其素志必契夙心當符魚水
之懽永保山河之誓應偽蜀文武員寮等或本朝舊族
或當代英賢或抱節於軍戎或著名於鄉曲久從睽隔
常賑情懷宜知乃眷之恩各勵歸誠之節今已降勅命
誠約諸道兵師如西川果決歸命到城內不得驚擾但
思效順勿致懷疑

後唐封孟知祥為蜀王策

朕祗膺天眷虔荷帝圖敷大信而仰法昊穹秉至公而
俯臨億兆彰善瘅惡必分涇渭之流崇德報功敢忘山
河之誓其有榮聯戚里任重係藩佐白水而中興為皇
家而盡節雖旁緣謬誤而竟保忠貞疏鑒未通朝海之
波瀾暫阻氛霾既定拱辰之光耀如初表章皆驗于推
誠琛費遠脩于述職得不顯其丹赤懋以旌酬益敦魚
水之懽永契君臣之道爰求吉日乃降徽章具官孟某

五緯佐天三山鎮地七年乃辨真為梁棟之材十德俱全信是琮璜之器先皇帝經綸人極濟活兆人李通首述其緯書鄧禹參加於霸業同心同德竟扶歸馬之朝不伐不矜罔恃濯龍之寵洎朕纂承鳳紀繫爾鎮守龜城鐵石彌堅菁茅不匱山川險絕每虔向日之心玉帛駿奔能助郊天之禮有臣若此當代何加董璋久作厲階終萌逆節既辜恩于覆載欲嫁禍于勲賢疊以封章疏其隣道虔劉我生聚離間我忠良爾外示協同潛懷

憤激衷聲言而誘諭彼既不迴伺良便以誅鋤乃期自
雪以至敢驅叛黨徑逼仁封吹虺毒以傷人奮豺牙而
暴物爾則妙施成筭徑出全師鼙鼓纏鳴旋聞落爪窠
巢自潰已致噬臍梓川之披霧風驅涪水之狂波鏡淨
解吾宵旰賴爾韜鈐固當銘在景鍾豈止光於信史况
復備輸懇款益驗傾虔叙魯館之寅緣述沛中之事舊
深心可見亮節斯彰不有疾風焉知勁草儻無異數曷
報崇庸由是並築將壇顯昇王爵兼兩藩之奧壤啓一

字之真封仍循益地之通規別改旌功之懿號賜之旌
鉞冊以輶車雖加等之寵光爾皆不忝在睦親之義分
予亦無虛於戲天鑒甚明為善者降之福祉君恩不黨
立勲者厚以獎酬唯敬慎於始終可延長於富貴勉承
兌澤永鎮坤維可授殿前檢校太尉兼中書令行成都
尹劍南東西兩川節度使管內營田觀察處置統押近
界諸蠻兼西山八國雲南安撫制置等使仍封蜀王加
食邑一千五百戶實封二百戶改賜忠貞匡國保大功

臣散官勲如故仍令所司擇日備禮策命主者施行

孟昶勸農桑詔

明德元年十二月

刺守縣令其務出入阡陌勞來三農望杏敦耕曠蒲勸
櫺春鶴始嚬便具籠筐蟋蟀載吟即鳴機杼

成都文類卷十六

欽定四庫全書

成都文類卷十七

宋扈仲榮等編

詔敕制

藝祖皇帝納降蜀主敕

敕蜀主省上表率文武見任官望闕瀝懇歸命事具悉
朕自皇天眷命率土樂推將期德服萬方不恃威加四
海乃眷益部僻處一隅苟黎庶之獲安非經營之在意

一昨災纏蜀地釁自并門既興王者之師遂授將軍之
鉞事非獲已須至用兵我且直詞彼衆自敗下劍門而
賈勇指井絡而長驅中宵喟然兆庶何罪徑馳駟騎嚴
誠前鋒廣宣來者之懷遍諭弔民之意果能率官屬而
効順拜表疏以祈恩託我慈親述乃寢廟封府庫而待
命保生聚而輸誠朕方示信懷柔不逼人險保無他慮
當體優隆國有舊章不違前請所宜悉也春寒想比清
休書指不多及

曲赦蜀川詔

門下伐罪弔民所以昭宣王畧青災肆赦所以盪滌羣
非徵有國之舊章盡哲王之能事朕飛龍撫運躍馬興
邦雖禹別九州盡為王土而蜀川一境獨隔華風天兵
飛度於劍門蜀主哀號而納欵念其生聚曲為保全宜
覃曠蕩之恩用慰傷殘之俗易苛政以平恕革重歛以
輕徭用舉宏綱貞我王度正月二十四日昧爽已前應
偽蜀管內罪無輕重常赦所不原者咸赦除之放今年

夏稅及公徵諸雜物色等一半人戶食鹽偽蜀估定每
斤一百六十文足令每斤特減六十文足令後只徵一
百文足其偽蜀內外文武臣僚能奉所主歸我大朝念
茲通變之方宜預旌酬之寵各令分析名銜申奏當與
加恩乃賜劍南北為內地自累朝之艱否據千里之江
山豈無沉滯之人宜下徵求之詔所在州郡及山林有
懷才負藝未霑寸祿者委長吏聞奏先賢丘隴不得樵
採古來廟宇咸與脩崇其餘節婦義夫順孫孝子有堪

旌貢當議舉明官吏軍民各勤職業樂予景運當慶新
恩告示一方感知朕意

封蜀降王孟昶為秦國公制

門下伯禹導川黑水本梁州之域河圖括象岷山真井
絡之墟考職方之地圖壯劍南之徼道屬中原多事遠
服未賓山河既限於侯封車服遂踰於王制朕削平寓
縣重正皇綱復周漢之舊疆寵綏羣后採唐虞之大訓
協和萬邦六載于茲百揆時序禮樂征伐之柄出自朕

躬蠻夷戎狄之鄉咸脩職貢今去順先庶而受律法時
雨以興師舜于暫舞於兩階湯網豁開於三面弔民伐
罪朕無愧焉咨爾僞蜀主孟昶挺生公族稟慶侯門值
唐朝將季之辰襲蜀王已成之業撫彼郡邑久歷歲華
而能察天地之惡盈知人神之助順盡率羣吏來降大
君望北闕以拜章指南陔而請命得不開懷禮遇撫弱
流恩官班特越於彝章保護彌光於大信豈比夫魏封
劉禪特昇驃騎之班隋侍蕭琮唯列莒公之號今茲示

寵以欲從人命作帝師俾榮開府策漢相專車之貴列
秦川萬戶之封併而授之斯為異數仍加祿俸用表優
隆爾宜思前代之命官體我朝之加等勉荷非常之澤
無忘匪懈之心佩服恩光往踐厥位可封秦國公

授孟玄喆兗州節度制

門下朕聞魏將降蜀君臣俱列於散官隋帝平陳子弟
不聞於封爵皇家順景風而行賞同時雨以濟師當敵
境未賓霆霹下戒嚴之令暨再拜請命慶雲垂利澤之

恩矧復降婁古封掌武崇秩曲阜是伯禽之國太尉乃
周勃之官山河距九州之雄綏冕冠三公之貴舉為賞
典斯實異恩僞國長子孟玄皓禮法於莊神彩英秀騁
脩途於早歲播令問於蜀川正朔未同列國而人稱世
子車書既混大朝而自是良臣以爾昔在三川常居二
職贊厥父之効順保祖母之高年予嘉乃心豈限彞制
是命陟將壇於東夏整武事於南宮憲秩封侯用光殊
渥將表臨戎之寄更增光祿之勛爾其分天子之憂勤

出將軍之法令與其改弦而易調不若從俗以安民布政頒條予誠有望榮家奉國爾宜勉之

逆賊王均平降德音

咸平三年春正月益州軍亂推神衛都虞候王均為首八月知益州兼川陝招安使雷有終敗賊黨復益州追斬王均於富順監詔川陝路繫囚雜犯罪以上並原之四年十二月丁未詔曰

門下朕臨萬寓德覆兆民執大象以御時應上元而為

理何嘗不慈恕在念肝曷為心思保大和用敷至化昨
者王均包藏逆態辜負國恩嘯聚危城驚騷遠土逮乎
撲滅尋至槩懸支黨已除詐誤之民反側未已宜令西
川除亡命徒伴見追捕外餘釋不問敢有訛言動衆情
劫害者斬訛以聞

賜程琳收獲刦盜逃兵獎諭詔

敕程琳省益州路轉運司奏云卿居樞近之司總朝
垣之政因逋逃之為患縱盜掠而累年密遣追胥盡擒

隱伏既誥誅於醜類致肅靜於鄉閭翳乃忠勤副予寄任攸司上奏宣力可嘉故茲獎諭想宜知悉

賜王驥父老借留獎諭詔

敕主駿省益州路轉運司奏

云眷茲右蜀素號名藩

委任非輕事權尤劇卿問望兼著中外荐更爰自近班出分重寄奉揚寬大之詔茂宣愷悌之風洽惠於吏民載歌謠於道路輿情胥悅列奏爰來減予宵旰之憂稱乃循良之選其在嘉歎不忘于懷故茲獎諭想宜知

悉夏熟卿比平安好遣書指不多及

國家眷輿鬼之分梁益之區拒上國千里之遙為西蜀一都之會控制蠻獠撫遏邊陲利害所生安危是繫非道積廊廟名高搢紳萬里隱乎金城五兵森乎武庫長謀足以經遠厚德可以鎮浮文有緯俗之方武有安民之略者不得預焉今府尹樞密直學士太原王公負經濟之才挺誠明之性運沉幾而察物韞清識以照微高表竦乎百尋雅量汪其萬頃按刑梓部黎庶於是不寃

掌憲栢臺佞倖因之知懼自茲紫宸選賢若雲之從龍
丹陛告猷如石之投水暨參延閣之貴屢膺出境之命
皇上嘉其亮節惠彼遠方亟陞宥密之嚴施委藩方之
寄公飲冰祗命叱馭遵途過劍山而物得陽春涉錦水
而歲逢甘雨暨黃堂布政彤禧問俗始乃明教化示詔
條邈揚愷悌之風誕變輕浮之俗次則恤民隱革吏姦
訟清而叢棘常空令正而寒霜自凜終則誠淳情戢兵
師力田而曠土皆耕以律而私門不犯然又招延秀異

旌勸良平殄奸宄之徒苗之去莠籍孤惄之戶網之舉
綱已而董之以威示之以信懷之以德綏之以仁導之
以詩書訓之以禮讓迄至羣心帖泰庶物休和多稼豐
登連甍富壽兩川安堵固無夜戶之虞千里嚮風盡有
春臺之樂一旦乃有十邑之叟四郭之彥惜鳳書之將
至恐熊軾之斯邁乃與瀝誠於外計奏功於中宸列牘
初上當寧稱歎迺降璽書以勞之示聖主得賢而遠方
受賜也宸章昭晰睿旨淵冲煥乎日月之麗天噭如金

石之薦廟宣揚兌澤誠告神方仰觀惟膚之辭實勸事
君之節既而闔府衙校耆耋縉黃等諷曰聖主示十行
之札形一字之褒雖聞紀勒郡齋庶傳於不朽豈若標
題仙觀用勸於後來而又罔棄顥蒙懇求紀述然念叙
賢人之事業雖學之於師察聖后之刑章幸居之於職
復乃得實狀寧假飾辭時景祐三年冬十月二十日益

州路提刑李定記

賜程戡修城池獎諭詔

敕程戡省益州路轉運司高良夫奏

云

蜀自漢唐以來

國之西屏控臨撫理專用材用器望者處之卿往嘗屬任復當眷付下教如昨布政猶新矧乃恤戎略以安邊憺威名而寧遠繕完壁壘經度溝池謀不踰時士皆罄力訖能集事人匪告勞刺部提封劄章指狀備虞暇豫允賴毗維申念勤庸弗忘嘉寵故茲獎諭想宜知悉

賜張方平父老借留獎諭詔

敕方平省益州轉運使高良夫奏

云

坤維一隅二蜀

為大慎擇良守時謂才難卿迺者輟宸朝祕寵之班委
寰輔密陪之鎮特更近屏專及遠邦此朕意欲撫御彈
壓以寬西顧果能厚政化以懷和孚教條而悅穆甄善
疾非而人愛其舉發姦擿伏而吏畏其神屢壞告登里
封去盜內無繫獄外無繁訟恩育惇獨惠康窮乏而乃
鄉居獻狀刺部奏陳或以奏計之期預希一借或以解
歸之次願畢三周惟漢有文翁廉范飭勵之規惟唐有
德裕元衡約束之略詳觀休績何愧前脩勉樹今圖以

光來譽省循嘉歎彌切眷懷故茲獎諭想宜知悉

賜趙抃父老借留獎諭詔

敕趙抃省成都府路轉運提刑司奏

云云蜀遠在西南

最要部也朕常患吏不能究宣德澤以被于遠民故其擇守非慈良簡重者不以命之卿在蜀甫踰年而使者以其治迹尤異上于朝廷夫吏所以治民也能盡其治民賴之豈不汝嘉乎故茲獎諭想宜知悉秋熟卿比平安好遣書指不多及

龍圖閣直學士天水公治蜀甫閱歲府之黎老子民舉
千百數伏使者車言曰蜀之壞陋衆夥俛首輸賦風尚
媢靡怯不驚立自公問俗布政闇略法禁緒正綱目坐
格醇茂仁義道德行為教化徭賦均節俗本生業人人
自愛以重犯法風雨時若粒米狼戾民惕然懼朝廷之
召遷而父母去我矣願上書借公留語聞上上以手迹
細札獎勵褒嘉之都人頓首伏讀欣喜蹈舞恭惟天詔
有慈良簡重治迹尤異之稱公恕物以仁約己以禮表

俗以信鎮浮以德故上知公之深如此漢膠東相成頴
川守霸皆有璽書勉勵異等効著在篇簡今公之拜休
寵者當有以揭金石刻永傳無窮而為西南藩維之光
華也書不云乎敢對揚天子之休命詩云虎拜稽首天
子萬年蓋報上歸美所宜侈大也治平二年九月一日
秘書丞闇灝謹序

賜王剛中訓諭詔

朕輓念坤維遠在一方德意雖深利澤未究故臨遣詞

臣往分閫寄卿其深體至懷務先惠養民間有疾苦官吏有貪殘悉以上聞夫蒞政在寬寬宜有制足用在儉儉宜中禮撫馭將士先之以和肅寧邊陲鎮之以靜則朕無西顧之憂矣佇聞報政嗣有寵嘉

紹興二十八年秋九月蜀以闢帥聞皇帝陛下諭旨遣從臣出鎮臣是時方代匱詞掖庚辰以臣制置四川兼治成都臣聞命震恐固辭不獲越十月庚寅引對便殿上宣諭四川利病至悉臣退而謹書之甲午正謝蒙恩

賜臣御寶帶象笏併賜行貲庚子朝辭復蒙宣賜御筆
訓諭詔書臣伏觀雲漢之章奎筆之盡心目憚眩大懼
無以承盛德稱明詔者竊嘗謂自古人君如漢光武命
帥以詔敕從事徒見於征討艱難之日而唐太宗賜羣
臣御書又皆燕閒無益之辭豈若皇帝陛下軫念坤維
去朝廷數千里將使利澤周決於六十一城之廣肆親
灑宸翰訓敕微臣察民間之疾苦糾官吏之貪殘涖政
尚寬猛之中足用制禮儉之節與夫撫和將士肅靜邊

陸皆閭寄之大方吏治之至要而臣起自諸生驟膺委
寄內揆庸淺實無他長惟當夙夜奉行詔旨庶幾有補
一方不負聖神所以拔擢臨遣之意臣載惟堯言布於
天下而舜詔岳牧辭列典謨臣既到官是用敢刻諸堅
珉昭示德意垂範無窮臣王剛中拜手稽首謹記

賜晁公武獎諭詔

敕公武朕聞蜀漢沃野有蔬果實之饒民食稻魚亡
凶年憂而比歲以來穀糴常貴民有飢色故易以為盜

豈民不務本吏苛刻之所致耶朕甚憫焉卿服在從班
習知德意乃能裁公帑之餘行平糴之政以復天聖守
臣之舊蹟其用心亦勤矣夫廣蓄積以實倉廩備水旱
此郡國之所先務也卿能知此朕復何憂載攬奏封良
深嘉歎故茲獎諭想宜知悉冬寒卿比平安好遣書指
不多少及

賜范成大獎諭

卿遠鎮坤維兼總戎律究心夙夜朕甚嘉之所進內教

將兵外修堡寨團結土丁三說皆善更益勉旃務在必行早見成效以副朕倚注之意

臣不肖日者待罪桂林蒙恩徙鎮蜀道次於荊州詔問西南邊事臣愚無識知嘗試妄論大要練兵丁繕保障儻事力弗給可若何行及廣漢則昧死上其說制下尚書其盼劍南西川度牒五百為縉錢三十五萬八千有奇以贍工費而賜臣八月二十五日璽書如前臣謹拜手稽首言曰昔堯舜之於羣臣聞其言善則俞之必有

訓敕之辭繼之曰懋哉曰往欽哉二典之書是已令陛下過聽擇於萬蕡又勉之以底績此堯舜之法二典之所以書也臣何足以得此雖貪天子之命以為已榮而一介齷齪狗馬蚤衰罷軟不自勝恐終無尺寸補益縣官且奸大何以隕越于下茲榮也祇所以為懼哉敬奉賜書被之琬琰以旦夕瞻仰於前其敢侈臣之榮識臣之懼而已

賜范成大措置和糴戒諭詔

蜀為西南屏蔽兵民庶務尤當平允宜相度諸處民之
豐約措置以均和糴之數及不得令在職官捨已所任
避難就易營攝別職以便私計其屯戍兵將官占護軍
人不分曲直唯務已勝將量罪輕重必罰無赦詳此戒
諭其毋怠忽

淳熙二年七月詔復四川制置司以成都府路安撫制
置使臣成大攝使事臣辭弗獲命奉印章唯謹於兵民
之政莫敢有所罷行廢十一月皇帝親御翰墨賜臣戒

諭雲章自天光被草莽昭回震耀不可擯藏謹昧死立
石與羣有司共之切惟井絡之區最遠天極吏之逸勤
民之戚休軍政之否臧不能以時上聞蜀父老病之久
矣陛下明見萬里無隱弗燭一札十行有德有刑雷風
鼓舞咫尺在上若見若聞靡不兢慄臣冒闇外之寄才
薄望輕不能先事舉職致煩威命之辱臣挾過且不暇
其何能奉宣大律以肅官政猶日夜引領庶幾萬一者
惟陛下亟命重臣俾大此官講明憲度罔有廢格則臺

家長無西顧之憂臣誠大幸卒蒙全覆歸伏田畝以終免於戾臣之願也非所敢望也

賜范成大措置和糴詔

關外四州每歲和糴之擾計其米數止十萬碩若以全蜀之力措置充代其數如何卿可疾速條具聞奏

臣竊惟秦隴宿兵數十年餉道回遠者仰哺於糴此公私俱贍之法吏亡狀猥以賤賈取盈於民弊久滋益至有倍蓰常賦什以上者愁歎之聲徹於聽聞皇帝若曰

民惟邦本本固邦寧矧茲遐毗奈何重困之且何以震
疊醜類懷徠舊俗故自淳熙二年以來詔旨為和糴而
下者亡慮八九惟階成和鳳四郡最並邊發政施仁宜
自今始既蠲糴一年又下聖書賜臣使講求餘財以代
民力臣駕闈乏會計才久之莫知所出姑請增賈九之
一勿收頭子錢罷盤量檢察官若朘削本錢苛斗面之
獎一切禁絕詔可是歲閼外小旱而四州菽粟顧狼戾
三家之市皆熙如春臺充代之榮猶未能盡如聖訓而

觀德之應其捷固已如此愚心了然見王道之易易也
敬奉奎畫被之琬琰以照臨西土使凡有司咸喻天子
德意志慮且以見仁義之得民誠有速於置郵承流宣
化者其可以不勉

成都文類卷十七